

Ahad, 15 March 2020 | 5:09pm



Pengamal media di Kelantan memakai topeng muka dan cecair pembasmi kuman sebagai langkah berjaga-jaga menghadapi gejala COVID-19. di Pejabat New Straits Times Press (NSTP). - Foto Nik Abdullah Nik Omar

Bekalan topeng muka habis di Kelantan

Oleh Nor Fazlina Abdul Rahim
nfazlina@nstp.com.my

KOTA BHARU: Bekalan topeng muka di negeri ini didakwa kehabisan sejak dua bulan lalu akibat permintaan tinggi berikutan penularan coronavirus (COVID-19).

Tinjauan di beberapa daerah di Kota Bharu, Pasir Mas, Ketereh, Tanah Merah mendapati bekalan topeng berkenaan tidak sampai sejak awal bulan lalu.

Pekerja di sebuah farmasi di Kota Bharu yang enggan dikenali berkata, sejak penularan COVID-19, kali terakhir mereka mendapat bekalan topeng berkenaan pada Januari lalu.

"Ia pun hanya tiga hari mampu bertahan kerana permintaan terlalu tinggi sehingga kita terpaksa menghadkan kuantiti penjualan.

“Sejak itu, bekalan topeng muka tidak sampai walaupun hampir setiap hari terdapat pelanggan datang bertanyakan bekalan berkenaan,” katanya ketika ditemui di sini, hari ini.

Sementara itu, Ketua Pegawai Penguatkuasa Kementerian Dalam Negeri dan Hal Ehwal Pengguna (KPDNHEP) Kelantan, Azanizam Affendi Juri, ketika dihubungi mengakui bekalan topeng muka sukar diperolehi.

“Ini bukan masalah negeri sebaliknya hampir seluruh negara menghadapi masalah sama dan isu ini sudah dibawa ke peringkat tertinggi.

“Hasil pemeriksaan di 23 pasar raya, 40 farmasi dan 20 kedai di seluruh Kelantan hari ini, mendapati bekalan topeng berkenaan hanya terdapat di sebuah pasar raya di Tumpat.

“Namun, itu pun hanya terdapat 25 keping, manakala di daerah lain semuanya kehabisan,” katanya.

